



Bersama
Prof Dr Taufiq
Yap Yun Hin

Prof Dr Yusuf al-Qaradawi menggariskan 11 prinsip dalam penentuan halal dan haram di dalam buku karangannya, *Halal dan Haram dalam Islam*.

Di dalam ruangan ini, penulis akan menyambung lagi beberapa prinsip yang dinyatakan pada artikel minggu lalu.

Prinsip keempat ialah 'Mengharamkan yang halal akan mengakibatkan timbulnya keburukan dan bahaya.' Sesuatu yang semata-mata menimbulkan bahaya adalah haram.

Sesuatu yang memberikan manfaat adalah yang halal saja. Sesuatu yang mendatangkan bahaya yang lebih besar daripada manfaatnya semestinya

Sesuatu beri manfaat adalah halal

adalah haram.

Prinsip kelima, 'Yang halal tidak memerlukan yang haram.' Islam tidak mengharamkan sesuatu kecuali digantinya dengan yang lebih baik dan mengatasi keperluannya.

Islam mengharamkan riba dan menggantikannya dengan jual beli yang lebih menguntungkan.

Prinsip keenam, 'Apa yang membawa kepada yang haram adalah haram.' Islam mengharamkan segala sesuatu yang dapat menjadi perantara dan membawa kepada yang haram.

Islam bukan hanya mengharamkan zina tetapi juga perkara dan perbuatan yang boleh mendekati zina seperti berpakaian yang tidak menutup aurat, berkhalwat dan pergaulan bebas.

Sebab itulah, golongan fuqaha menetapkan prinsip 'Apa saja yang membawa kepada yang haram, maka ia adalah haram.'

Islam turut menetapkan

dosa perbuatan haram tidak terbatas pada pelakunya saja tetapi mereka yang terbabit sama ada dalam bentuk tenaga, material dan moral.

Dalam permasalahan arak sebagai contoh, Rasulullah SAW melaknat peminumnya, pemerahnya, penghidangnya, yang diberi hidangan, yang memakan hasil usahanya dan lain-lain.

Prinsip ketujuh, 'Mengharamkan yang halal dan menghalalkan yang haram adalah haram.' Islam mengecam orang yang suka mengharamkan dan menghalalkan sesuatu perkara yang tiada nas padanya.

Namun Islam lebih mengecam orang yang mengharamkan perkara yang halal. Perbuatan itu menyempitkan apa yang diluaskan Allah SWT.

Pendapat seperti itu juga akan menampakkan Islam sebagai agama yang bersifat keterlaluan tanpa ada prinsip sederhana.

Prinsip kelapan, 'Niat yang baik tidak dapat menghalalkan yang haram.' Sesuatu yang haram tetap akan haram walaupun dalam mencapai yang haram itu mengandungi niat yang baik, tujuan mulia serta sasaran yang tepat.

Islam tidak reda menjadikan yang haram sebagai jalan untuk mencapai tujuan terpuji. Contohnya, Islam tidak memperkenankan keuntungan penjualan arak untuk pembangunan masjid.

Tujuan yang mulia hanya boleh dicapai dengan cara yang betul. Tidak boleh menggunakan matlamat yang baik untuk menghalalkan perbuatan yang jelas salah dan haram.

Contohnya, tindakan Robin Hood yang mencuri harta orang kaya untuk membantu orang miskin tidak boleh diterima.

Prinsip kesembilan, 'Menjauhkan diri daripada syubhah kerana takut

terjatuh dalam haram.' Rasulullah SAW bersabda yang bermaksud: "Yang halal itu jelas dan yang haram itu juga jelas.

"Di antara keduanya terdapat perkara yang belum jelas (syubhah), yang tidak diketahui ramai orang, apakah itu halal atau haram?"

"Barang siapa yang menjauhinya kerana hendak membersihkan agama dan kehormatannya, maka dia akan selamat dan barang siapa yang melakukan sesuatu daripadanya hampir-hampir ia terjatuh ke dalam yang haram sebagaimana orang yang menggembala kambing di sekitar kawasan larangan, dia hampir-hampir akan jatuh ke dalamnya. Ingatlah, setiap raja mempunyai kawasan larangan. Ingatlah, kawasan larangan Allah SWT ialah semua yang diharamkan." (Riwayat Bukhari dan Muslim)

Prinsip ke-10, 'Sesuatu yang haram berlaku untuk semua orang.' Dalam mengharamkan sesuatu, tidak ada keringanan bagi golongan orang kecuali dalam keadaan darurat.

Tidak ada pengecualian terhadapnya. Contohnya, keturunan nabi atau raja atau orang yang dianggap alim.

Prinsip ke-11 ialah 'Keadaan yang terpaksa membolehkan yang terlarang.' Firman Allah yang bermaksud: "Barang siapa dalam keadaan terpaksa (memakannya), sedang ia tidak menginginkannya dan tidak (pula) melampaui batas, maka tidak ada dosa baginya. Sesungguhnya Allah maka pengampun lagi maha penyayang." (Surah Al-Baqarah, ayat 173)

Penulis ialah Presiden Persatuan Cina Muslim Malaysia (MACMA) dan profesor di Universiti Putra Malaysia (UPM)